

DISSERTATIO MEDICO-CHIRURGICA INAUGURALIS,  
DE

# FISTULA URETHRÆ VIRILIS,

Q V A M,

AUSPICE DEO PROPITIO

*Et Consensu atque Auctoritate Gratiſſæ Facultatis Medicæ*  
IN ALMA REGIA FRIDERICIANA,

P R Æ S I D E

DN. D. MICHAELE ALBERTI,

SACR. MAJ. REG. BORUSS. AULICO ET CONSIST. MAGDEB. CONSILIARIO,  
MEDICINÆ ET PHILOSOPHIÆ NATURALIS PROFESSORE PUBLICO OR-  
DINARIO, ACADEM. CÆSAR. NAT. CURIOS. COLLEGA, SOCIET.

REG. BORUSS. SCIENT. SODALI, ETC.

DECANO H. T. SPECTATISSIMO,

*Domino Patrono, Præceptore ac Promotore suo omni honoris cultu prosequendo,*

PRO GRADU DOCTORIS

SUMMISQUE IN MEDICINA HONORIBUS ET PRIVILEGIIS  
DOCTORALIBUS LEGITIME IMPETRANDIS,

HORIS LOCOQUE CONSVETIS,

ANNO MDCCXXVIII. D. OCTOBR.

PUBLICÆ AC PLACIDÆ ERUDITORUM VENTILATIONI  
SUBJICIET

AUCTOR RESPONDENS

JOANNES FRIDERICUS Becker,

HAL. MAGDEB.

# ALU

THESE VIEWS

THESE VIEWS

THESE VIEWS

THESE VIEWS

THESE VIEWS

THESE VIEWS

THESE VIEWS

THESE VIEWS

THESE VIEWS

THESE VIEWS

THESE VIEWS

THESE VIEWS

THESE VIEWS

THESE VIEWS

THESE VIEWS

THESE VIEWS

THESE VIEWS

THESE VIEWS

THESE VIEWS

THESE VIEWS

THESE VIEWS

THESE VIEWS



**VIRIS**

*EXCELLENTISSIMIS AMPLISSIMIS NOBILISSIMIS  
ATQUE EXPERIENTISSIMIS*

**D O M I N O**

**DN. D. JO. THEODO-  
RO ELLERO,**

SACR. REG. MAJEST. BORUSS. CONSILIARIO AULICO,  
COLLEGII MEDICO-CHIRURGICI BEROLINENSIS PROFES-  
SORI THERAPEVTICES, SUPREMI COLLEGII MEDICI  
DECANO, MEDICO CASTRENSI PRIMARIO, SOCIET.  
REG. BORUSS. SCIENT. COLLEGÆ,

NEC NON

**D O M I N O**

**DN. D. CASPARO  
NEUMANNNO,**

COLLEGII MEDICO-CHIRURGICI BEROLINENSIS PRO-  
SESSORI CHYMIÆ PRACTICÆ, SUPREMI COLLEGII ME-  
DICI MEMBRO, ACAD. CÆSAR. NAT. CURIOS.

UT ET SOCIETATUM REGIARUM BRITANNICÆ  
ET BORUSSICÆ SODALI,

**DNN. PATRONIS AC STUDIORUM MEORUM  
PROMOTORIBUS**

ÆTERNUM SUSPICIENDIS ET COLENDIS

*DISPUTATIONEM HANC INAUGURALEM  
IN CULTUS SEMPITERNI PIGNUS*

D. D. D.

**A U C T O R.**



# VIRI EXCELLENTISSIMI.

**P**ublicæ literariæ arenæ quod jamjam committere aggredior, levidense qualiumcunque meorum, quos in arte feci, perfectuum documentum, id Inclyto Nomini Vestro consecrare justum omnino necessariumque duxi. Postulant enim, imo jubent tot tantaque a Vobis, VIRI AMPLISSIMI, larga scaturigine in me derivata beneficia grati devotique animi officium, quod jam diu debeo, citius tamen persolvere occasionis viriumque recusavit penuria. Jure certe meritissimo notandus  
essem



essem ingratae mentis macula, si alto obliterari paterer silentio, quam propenso ac plane paterno amoris affectu me & mea studia amplecti coepertis, quum prima Vobis Berolini innotescendi mihi suppeditaretur occasio. Verum non Vobis satis erat, innumeris me in illustri hac civitate degentem cumulasse beneficiorum generibus, sed & post illa tempora, quin etiam ad hunc usque diem Vestro me dignati estis favore, ut, quotiescunque tacita apud me perpendo cogitatione, quam ardentius in moliminibus meis adjuvandis meaque salute promovenda flagretis desiderio, toties quoque ad edenda integerrimae erga Vos reverentiae meae specimina instimuler. Ecquod autem luculentius gratitudinis testimonium, Vestris, licet nunquam satis ex aequo commendandis in me meritis plane impar, producere possem quam praesentem hanc Dissertationem Inauguralem, Vestro conspectui non solum sistendam, sed & Spectatissimo Nomini inscribendam. Accedit, quod Vestra insuper tutela protectioneque, utpote qui & auctoritate & rerum peritia ambo valetis, indigere mihi illa videbatur, quo a malevolorum obtrectationibus, quorum spicula sat gravia pertimescit, secura reddi possit tutaque. Suscipite igitur, VIRI EXCELLENTISSIMI, PATRONI EXIMI, suscipite serena placidaque fronte exilem hunc in-



genii mei foetum leveque hoc munusculum char-  
taceum in perpetuum debitæ pietatis, & observan-  
tiæ mnemosynon certique estote, quod nulla un-  
quam, quamdiu spiritus hos reget artus obstri-  
ctissimum animum captura sit præstitæ benevolæ  
propensionis oblivio. Servet Vos, precor, Supre-  
mum Numen in longissimam annorum seriem  
salvos ac incolumes in universæ rei literariæ ac  
inprimis artis medicæ incrementum amplissi-  
mum, Splendidissimarum Vestrarum Familiarum  
florem perpetuum multorumque ægrotantium  
solamen exoptatissimum. Quod reliquum est,  
summæ Vestræ benevolentiae atque patrocinio me  
ut nullo non tempore commendatum habeatis,  
est, quod enixissime a Vobis peto contendoque.  
Valete & favete

## EXCELLENTISSIMORUM NOMINUM VESTRORUM

*Cultori devotissimo*

JOANNI FRIDERICO BECKERO.

I. N. J.





I. N. 7.

DISSERTATIO MEDICO-CHIRURGICA INAUGURALIS,  
DE  
**FISTULA URETHRÆ  
VIRILIS.**

---

**P R O O E M I U M.**



Hirurgiam Medicinæ par-  
tem cum antiquissimam & præ-  
stantissimam, tum maxime cer-  
tam ac evidentem esse pariter-  
que ad sanitatem, partium in-  
primis externarum vitiis labe-  
factatam, reducendam conser-

vandamque quam maxime contribuere, nemo, cui-  
cunque artis hujus, quæ artificiosa manuum opera  
opem fert ægrotantibus, faciem propius intueri da-  
tum



tum est, ibi inficias. Ad antiquitatem enim quod attinet, jam ante Hippocratis tempora a Græcis, Arabibus, Ægyptiis, Babylonis atque Chaldeis coli & exerceri suevit, imo ante diluvium prima ipsius fundamenta, quantumvis valde imperfecta, jacta fuere, cum secundum sacrum codicem, tyrannorum itemque facinorum turpium tunc temporis commissorum mentionem injicientem, non potuerint non omnis generis vulnerationes, plagæ, fracturæ, ambustiones aliæque læsiones accidere quamplurimæ. Ex prisco autem ævo præ reliquis Chironem, Æsculapium ejusque filios Machaonem & Podalirium Trojani belli tempore maxime inclaruisse, historiæ confirmant monumenta, utpote qui medendis vulneribus, ulceribus aliisque afflictionibus externis sanandis sedulam navaverunt operam. Inter omnes vero potissimum eminet ex eadem Æsculapii prosapia oriundus Hippocrates, quem postea Celsus, Galenus aliique plures secuti sunt, qui in Chirurgia excolenda, augenda eaque cum Medicina arcitissimo vinculo copulanda mirifice desudavit. Hac itaque ratione semper majora cepit incrementa Chirurgia, ubi tamen silentio involvi nequit, per aliquot postmodum sedula barbara non ita magnos aut memoratu dignos in eadem æque ac reliquis scientiis progressus factos fuisse, donec tandem decinio quarto & præcipue superiori seculo nostrisque temporibus, ubi anatomes atque mechanices scientia magis agitata longeque cultior ac perfectior reddita fuit, pluribus operationibus, quas veneranda antiquitas ignoraverat,



raverat, aptioribusque instrumentis ac encheirisis locupletata in altum illud, in quo nunc illam animadvertimus, fastigium perducta ac elevata est. Nunc ad Chirurgiæ evidentiam perspiciendam gradum jacturus, illam vel exinde comprobatam dari posse, judico, quod in aliorum morborum curationibus cum animum teneat suspensum, utrum vigori corporis, an medicinæ efficaciam adscribi mereatur secunda valetudo, in hac arte, quæ manu curat, verissimum sit, manifestiusque sensibus pateat, omnem fere bonum successum plurimum a sola chirurgi, nec temere, nec timide se gerentis, peritia atque solertia derivandum esse, imo nonnunquam ipsius dexteritati in totum deberi, id quod diversæ lithotomiam instituendi methodi, luxationum repositiones, artuum amputationes, fistularum commodæ sectiones atque curationes & id genus alia satis superque evincunt, ita ut ulteriore argumentorum allegatione supersedere possim. Quibus omnibus itaque sæpius sub rationis examen vocatis, suasu & ductu Excell. Dn. Præceptorum nixus, nervos industriæ maxime omnium in sufficiente chirurgicæ artis notitia acquirenda collocavi & cum Gratiōsi Medicorum Ordinis consensu speciminis inauguralis loco eruditorum censuræ thema exhibendum esset, ita placuit præ aliis chirurgicum seligere & circa Fistulæ Urethræ Virilis enucleationem pro ingenii modulo vires proprias periclitari. Hujus vero affectus disquisitionem dum paro & aggredior, ante



omnia Deum Ter Optimum Maximum supplex veneror, ut gratia sua benignissima hunc laborem & meditationes huic negotio impensas fovere ac in solatium miserorum mortalium dirigere dignetur clementissime. Amicum autem lectorem, quodsi non omnia acu tacta deprehendat, humanissime rogo, recordetur illius Senecæ eloquii, quod magnarum rerum etiamsi successus non fuerit, ipse conatus sit honestus.

§. I.

**P**athologicam Fistulæ Urethræ Virilis pertractationem suscepturus operæ pretium duxi, brevem quandam delineationem anatomicam tum meatus urinarii, tum prostaticarum atque vesicularum seminalium tanquam partium ad pleniorē hujus fistulæ explicationem haud leve pondus afferentium quoad situm, connexionem, structuram atque fabricam paulo solertius præmittere, quo intellecto naturali harum partium statu in indaganda & rimanda earum præternaturali & morbosa constitutione eo felicius & facilius commorari possimus. Est autem Urethra virilis canalis membranaceus, longitudine duodecim, aut tredecim pollicum, amplitudine calami scriptorii adæquans, a vesicæ collo, cui conjungitur, ad glandis usque apicem exporrectus, urinæ & seminis transmissioni inserviens.

§. II.

Quod ad situm urethræ attinet, illum nanciscitur



tur in sulco, quem concedit interstitium in parte inferiori duorum corporum nervosorum penis conspicuum & quidem a loco coalitionis horum corporum ad extremum glandis usque. Progressum autem servat suum urethra non recta via, sed a parte, inter prostaticam, principium urethræ cingentem, & initia cavernosi urethræ corporis posita, omnium optime adnotante Morgagn. *Advers. Anat.* III. p. 82. in singularem ducitur flexuram, ita ut, quemadmodum primum paululum juxta intestinum rectum descensum formaverat urethra, nunc ab anteriore illius parte ad corporum penis cavernosorum mutuam junctionem assurgendo pergat, ubi postea cum ipso pene deorsum flexa atque pendens observatur. Conflata est urethra ex duabus membranis, exteriori & interiori & corpore his interposito spongioso, per quod ab autoribus, ut a Terraneo Libro de Glandulis parvæ glandulæ sparsæ dicuntur. Notatu dignum est, quod spongiosum ejus corpus non æqualis undique crassitie deprehendatur, sed inter finem prostaticæ & corporum nervosorum concursum notabilem præ se ferat crassitiem, protuberantiam, quæ bulbus urethræ vocari solet, efformando, deinde vero sub reliquo decursu magis attenuetur, donec in glande rursus expandatur externamque hujus substantiam spongiosam totam constituendo desinat, quemadmodum Ruyschius in *Observ. Anat. Chirurg.* obs. 100. idem confirmat, contra Regnerum de Graaf, qui lib. de org. vir. genit. spongiosum urethræ corpus in glande penitus obliterari autumavit. Hic non re-



ticendum esse cenſeo, deſcriptum hoc urethræ corpus ſub inflatione atque erectione penis ſanguine quoque repleri hacque ratione ad majorem peni expansionem conciliandam ſymbolum pariter conferre ſuum, flacceſcente vero pene rurfus detumeſcere hujusque corporis adeoque & glandis turgescen-  
tiam toties contingere, quoties corpora nervoſa penis turgere cernantur & vice verſa. Attentionem porro meretur ſuperficies urethræ interior, quæ in inferiore parte prope veſicæ collum eminentia quadam longitudinali caput gallinaceum appellari ſolita, dotata animadvertitur, ad cujus latera proxime communes veſiculis ſeminalibus & vasis deferentibus ductus duplici orificio ſemen expellunt, ſecus ac Leal Lealis Epist. de part. ſem. in vir. conf. & eum ſecutus Vir quidam in Belgio celeberrimus docent, uno nempe canale excretorio veſiculas ſeminales in urethram hiare, avtovpſia contrarium monſtrante, aſſerentes. Inter hæc duo foramina tertium quoddam conſpici ſolet, interdum his paulo ſuperius aut inferius & paulo majore apertura inſtar parvæ fiſſuræ præditum, quæ ſecundum dictæ eminentiæ longitudinem incifione dilatata ſinulum compreffis veſiculis ſemen eructantem oculis objicit. Hoc foramen a Cl. Morgagnio detectum in Adverſ. Anatom. IV. p. 6. accuratius deſcriptum eſt & in quam plurimis ſubjectis facili reperitur negotio. Præter dicta vero foramina adhuc plura circa caput gallinaceum viſui ſe offerunt orificia, numero decem aut duodecim complectentia, quæ totidem emiſſariis a proſtata ortum trahen-



trahentibus & in urethra liquidum deponentibus debentur. Reliquum superficiei interioris urethrae quod spectat, tunc illud variis foraminibus seu osculis excretoriis, in quibus varii terminantur ductuli, rotundis & oblongis obsessum est, in primis vero in supremo urethrae, quo corporibus nervosis alligatur pariete, extat linea quaedam albicans, in cujus lineae fere medio locuta observantur secundum urethrae longitudinem foramine majora oblonga, inquirentium oculis facile se sistentia, quae compressione humorem sub albidum spissioris substantiae exhibent, de quibus conferantur Morgagn. Advers. I. Tab. 4. Fig. 4. Majora vero haec foramina non sola sunt, quae urethram permeant, sed longe plura, minora tamen, hinc inde sparsa in interna ejus tunica occurrunt foraminula, liquorem descripto haud ab similem identidem proferentia. Num vero peculiaribus ortum debeant glandulis haec oscula & ductus, hoc nondum ex anatomicis pro certo affirmari potest. Omnium denique horum ostiolorum usus in eo consistere videtur, ut liquido, quod ab iisdem destillat, lubricum redditum urethrae cavum partim transituro semini faciliorem concedat transgressum, partim etiam ut ab urina majorem forsan acrimoniam nacta defendatur.

### §. III.

Sequuntur consideranda corpora nonnulla glandulosa, urethrae appolita atque annexa, inter quae primo loco ponendae erunt Prostatae five uti a recentioribus rectius vocantur, Prostata, quae corpus quod-



dam oblongo globosum, cordiforme, urethræ principio circumnatum & instar nucis juglandis magnum exhibet. Mox ante vesicæ collum non procul a vesiculis seminalibus situm habet & construitur ex duodecim communiter glandularum classibus, liquidum secretum in totidem loculos, nullam prorsus inter se communicationem foventes, deponentibus, unde duodecim rursus canales excretorii prognati liquorem albicantem, pinguem, spermate aquosiores in urethram expellunt. Quo vero ipsius se & excretio facilitetur, fibris muscularibus circum septa est prostata, quæ non solum exteriora cingendo, sed & in interiora se immergendo ad se & excernendum contentum humidum symbolum conferunt suum. Hic humor urethræ lubricandæ inservit & cum tempore coitus simul effundatur, videtur semen spissius diluere ipsique vehiculum subministrare, quo eo melius atque vegetius ipsius per penem ejaculatio succedere possit. Dantur ulterius adhuc aliæ tres minores glandulæ a solertissimo Angliæ Anatomico Guil. Cowpero detectæ atque in ejus descript. glandul. nuper detect. diligentius expositæ, a quibusdam prostatæ minores, ab inventore autem glandulæ mucosæ dictæ, quarum duæ, in utroque urethræ latere una, inter bulbum ejusdem & musculos acceleratores sitæ deprehenduntur, parvum phaseolum magnitudine fere referentes & humorem quendam glutinosum per peculiarem meatum excretorium, quo quævis gaudet glandula, in urethram evomentes: Tertia autem lentem representans in angulo curvaturæ urethræ



thrae sub ossibus pubis intra spongiosam ejus texturam situm habens venditatur. Perraro inveniuntur glandulae hae Cowperianae, summa quantumvis industria, locum ubi positae describuntur viciniamque omnem perquiras, ita ut in dubium tantum non vocari possent, nisi exercitatissimus Morgagnius, se eas plus vice simplici in variis cadaveribus offendisse in Advers. Anatom. IV. pag. 25. fateatur. Tandem non omittenda est glandula Littriana quae statim subterminatione prostatae inter urethrae membranas & quidem internam ejus membranam in formam Zonae cingendo sita conspicitur. Latitudine pollicem, crassitie vero duas lineas aequat; caeterum colorem praese fert obscure rubicundum, pariterque liquidum per aliquot foraminula in urethram exprimit.

#### §. IV.

Peculiares quoque sunt musculi, qui ad urethram ejusque dilatationem atque constrictionem pertinent. Dilatationi inserviunt musculi transversus & Dilatator posticus. Transversus a Fabricio ab Aquapendente inventi nascuntur maximam partem, nisi defint, a tubere ossium Ischii & in posteriora & superiora bulbi urethrae inferuntur. Dilatator posticus vero sive Triangularis, quem Littrius inter urethrae dilatatores primum retulit, principium capit ex parte inferiore & antica sphincteris intestini recti & finitur in bulbi urethrae parte inferiore & postica. Deficientibus musculis transversis hic, qui alias gtacilior atque non adeo conspicuus, magis carnosus



atque perfectus deprehenditur, quo majori polleat capacitate priorum vices supplendi. Recensitorum vero musculorum functio in eo consistit, ut ampliando & diducendo urethram faciliorem liquido, si-  
ve semen siue urina fuerit, introitum concedant, quod deinde mediante urethræ compressione atque constrictione penitus expellendum est. Huic constrictioni peragendæ velificantur muscoli accelera-  
tores, qui uno extremo utrinque forti corporum penis spongiosorum membranæ annexi, in quo lo-  
co ob terminos firmiores ortus quoque ipsis assignari potest, fibris oblique decurrentibus cavernosam ure-  
thrae substantiam ejusque bulbum ambiunt atque altero extremo in linea, quae ex horum junctione saepius formatur inque bulbi medio visui se prae-  
bet, terminantur. Hi muscoli, dum agunt, constri-  
gunt bulbum adhaerentemque urethram, qua con-  
strictione, quotiescunque penis inflatur atque erigi-  
tur, non solum sanguis ad ejus distensionem adau-  
gendam intra spongiosum urethrae corpus fortius cogitur atque versus glandem propellitur, sed ho-  
rum musculorum contractione etiam id efficitur, ut semen in coitu atque urina sub mictu ex urethra expellantur. Discreta tamen ratione id succedere in feminis ac in urinae emissionem, probabile est, eo quod sub feminis, manifestis subsultibus excerni so-  
liti ejaculatione per vices se contrahant ac rursus re-  
mittantur hi muscoli, quod sub urinae egressu non observatur, in quo itaque eos potissimum tunc age-  
re, judicandum est, quando excreta urina illa, quae  
in



in urethra subliterat, adeoque postremae guttae foras ejiciendae sunt. Quare his musculis in senio confectis non rite officio suo defungentibus lotii reliquiae non aliquo impetu expelluntur, sed potius guttatim ex urethra stillant, quod non solum insignem parit molestiam, sed & ad erosionem urethrae ab urina, ibi diutius moram neccente, inducendam occasionem suggerit amplissimam. Gaudet quoque urethra cum annexis glandulis & musculis copiosis, vasorum sanguiferorum tam arteriosorum, quam venosorum, ramificationibus, quae partim a pudendis internis tanquam ramis iliacorum internorum sive hypogastricorum, partim a pudendis externis, quae per exteriora magis distribuuntur & iliacorum externorum propagines sunt, suam trahunt originem. Neque destituuntur hae partes vasis lymphaticis, utpote quae a Cowpero in Myotom. reform. & Drackio in Antropologia egregie descripta atque delineata exhibentur. Quod ad nervos attinet, nanciscuntur illos praecipue ab ultimis ex osse sacro prodeuntibus, non excluso simul nervo intercostali, qui variis furculis urethrae, prostaticis, musculis constriktoribus atque dilatatoribus reliquisque vicinis partibus prospiciunt.

§. V.

Devolvor nunc ad vesicularum seminalium perustrationem, quae sunt capsulae duae membranaeae, secundum Lealem intestinula caeca repraesentantes, in diversas cellulas, gyros & anfractus ita distributae, ut communicatione inter se invicem fru-

C

antur.



antur. Locantur inter intestinum rectum ad partem posteriorem colli vesicae, quorum propterea membranis connectuntur, insuperque ex membrana satis valida sunt conflatae, quo se constringere atque semen binis in hunc finem formatis ductibus in meatum urinarium evomere possint. In his vesiculis semen per vasa deferentia advectum colligitur, reconditur & diutius in futura veneris exercitia aservatur, secus ac contingit in canibus, qui receptaculis istis seminis retentioni dicatis privati, operosius coitum celebrare coguntur ob excrescentiam, qua gaudent in pene spongiosam, sub congressu turgidam redditam, nec prius, quam sufficienter emissum fuerit semen, rursus detumescentem. Quum vero in dictis capsulis succus deponatur seminalis nec in veneri litantibus excernatur, admodum probabile est, tenuissimam ejus partem per vasa lymphatica ad interiora corporis regredi horumque beneficio in massam humorum denuo infundi. Respectu vasorum sanguiferorum notandum, illa proficisci a pudendis internis, quae praeter vesiculas seminales, collo vesicae, levatoribus ani pluribusque aliis partibus ramos largiuntur. Neque minus hic praesto sunt nervosae propagines, utpote quae partim nervo intercostali, partim ultimis spinalis medullae nervis ex osse sacro egredientibus debentur.

§. VI.

Explicata sic & evoluta ex anatomicis urethrae, vesicularum seminalium & prostaticarum descriptione, quantum quidem eam ad potissimorum phaenomeno-

meno.



menorum explanationem necessariam esse reputavi, ad ipsam fistulae, cui dictae hae partes patent atque obnoxiae sunt, investigationem me accingo. Intelligo vero per fistulam urethrae ulcus inveteratum, plus minus sinuosum, callo obsessum, materiam pravam ichorosam distincte foerentem fundens, urethram ejusque partes vicinas diversimode infectans.

### §. VII.

Ulceris inveterati nomine hanc ob rationem insignitur, quod a corruptione humorum inprimis lymphatico-serosorum hincque producta partium fibrosarum sordida ac putrida successiva dilaceratione & exesione primordia capeffat atque excretionem humoris saniosi, interdum manantis, interdum spissioris, pro partium læsarum ratione colore atque odore valde adversi stipatum sit. Unde toto cœlo distat ab apostemate, quod cavitatem satis amplam exhibet & pus laudabile bene coctum, nempe materiam quandam albicantem, non adeo liquidam atque tenuem, sed paulo crassioris consistentiæ, striis cruentis conspersam complectitur, ut ita axioma, ubi pus, ibi ulcus est, veritati haud sit consentaneum. Sinuosum solet esse hoc ulcus, vel unum simplicem ductum depascente sua virtute sibi formans, vel etiam pluribus angustis cavernulis & tractibus hinc inde excurrentibus: cum vero non saltim sit sinuosum, sed etiam fistulosum ulcus & ad essentiam fistulae pertineat, ut semper cum duritie & callositate præsertim in labiis externis sit conjuncta, quibus respectibus ab



ulcere quoque sinuoso differt, quantumvis alias ulcera omnia vel ratione corporis pravis humoribus referti, vel ex incongrua Medici cura, vel ex inobedientia patientis reddi possint callosa, hinc præfens quoque, de quo agitur ulcus fistulosum, callositatibus coalitionem impredientibus obsessum atque obdusum animadvertitur. Labiis enim hujus fistulæ callosa satis firma atque dura substantia accreta conspicitur, quæ, quo inveteratior est, eo magis interiora, carnem nempe subjectam & totum fistulæ ductum investit majoraque indies capit incrementa, orificiis non raro ita præclusis, ut haud sufficiens ad fundum fistulæ pateat aditus, quare ob talem occallescentiam specillum cavitati intrusum sensum dolorificum haud inducit neque sanguine conspergitur adeoque parum dolentem talem fistulam esse subindicat.

§. VIII.

Hæc urethræ virilis fistula foramine extus in perinæo apparente communiter perinæi fistula vocari solet, ita quidem, ut in compluribus quoque libris chirurgicis, de priore alias penitus silentibus, per hanc ultimam nullam aliam nisi urethræ fistulam maximam partem subintellectam deprehendamus, minus tamen adæquate & accurate illud fieri exinde liquet, quod fistulæ perinæi adesse possint citra urethræ læsionem & vicissim urethram invadere deprehendantur ulcera fistulosa, ubi perinaeum saluum est & integrum, tametsi negari nequeat, haud raro utrasque has partes causa inprimis externa ansam suppeditante talibus insimul affici posse ulcerationibus



nibus. Rectius itaque nomen sibi vindicat haec fistula a parte, quam praecipue destruit atque corrumpit. Infestat vero potissimum illam urethrae partem, quae perinæo atque scroto opposita deprehenditur ibique non tantum illam solam pervadit, sed & sæpius partes adjacentes, prostates, vesiculas feminales, vesicae collum atque membranas intimius perreptat, perruptione nonnunquam facta in perinæo, quæ tanto facilius ab externa prægressa læsione accidit, variisque cuniculis versus scrotum pariter ac intestinum rectum excurrentibus, illudque perforantibus, effluente simul urina & materia faniosa per anum, qualem fistulam in milite a causa venerea accedente contusione harum partium obortam vidi, qua etiam hecticis febrilibus commotionibus supervenientibus occubuit. Similis notæ fistularum urethrae exempla, quanquam respectu nonnullarum circumstantiarum aliquantum diversa consignata legi possunt passim in observationibus apud Hildanum, Marchettum atque Forestum. Quae vero reliquum urethrae tractum corporibus cavernosis penis junctum afficiunt ulcera fistulosa, illa aut rarius occurrunt, aut pro fistulosis non sunt habenda, qua de causa etiam de prioribus modo allegatis in praesenti dissertatione mihi praecipuus erit sermo.

§. IX.

Quod vero urethram prae reliquis corporis partibus facilius aggrediantur ulcera fistulosa, nulla alia videtur subesse ratio, quam quod largiori humorum decubitu atque transfluxui magis exposita sit,



dum a lymphatico - seroso liquido ex ductibus & canaliculis Morgagni copiosius promanante, ut & ex prostaticis saepius exprimi solito non solum ubertim irrigatur, sed & aqueo - salinus humor, urina nempe transiens illam perpetuo madidam relinquit, unde non potest aliter fieri, quin facta urethrae vulnere in lithotomia vel alia ipsius undecunque prognata læsione urina salibus acerbis onusta erosioni atque exulcerationi inferendæ insignem in modum velificetur, sub qua ulcerosa corruptione materia ichorosa, quæ a tali ulcere separatur, continuo pravaru[m] humiditatu[m] affluxu sustentata ulterius semper proserpendo fistulosam demum reddit urethram similemque partibus vicinis labem adspersit. Quare in deplorando versantur statu ægroti, tali fistula, apertura in primis, per quam perpetuo urina effluit, in perinæo conjuncta, laborantes, cum partim interdum fundamentalis non expectanda sit curatio ob varia impedimenta remotu difficillima fusius infra exponenda, partim etiam nullo non tempore contingens humoris saniosi atque urinæ effluxus lintheamina madefaciendo & conspurcando summas creet molestias, per sat insigne temporis spatium aut forsan nonnunquam per integrum vitæ decursum ab ægrotante patienti animo perferendas.

§. X.

Gradum nunc jacio ad differentias fistularum urethrae pensandas, utpote quarum indagacionem ad curam feliciori successu suscipiendam momentum haud contemnendum afferre judico. Dispesce autem



tem possunt varie juxta diversitatem observationum chirurgicarum hæ fistulæ & quidem præcipue ratione aperturæ suæ in patentes atque latentes sive cæcas, illæ apertura in partibus externis obvia, quod præcipue hic valet de perinæo atque scroto, oculis se obijciunt, hæ vero foramine introrsum spectantē urethram pertundunt, materiam saniosam in ejus cavum dimittendo. Porro eas distingui posse existimo in internas & externas, inter quas priores intus feruntur, perforando ipsum urethræ corpus, imo per partes interdum contiguas, vesicam, intestinum rectum progrediendo: posteriores vero ad latus urethræ serpendo illam in superficie saltim arrodunt ac afficiunt vel etiam intra ejus substantiam se insinuant. Non minus quoque dividi possunt in completas & incompletas, quarum illæ partes internas æque ac externas perreptant atque apertura tam exterius, quam interius conspicua se produnt, cum hæ e contrario orificio vel intus vel extus solum existente se manifestent. Notabile ulterius discrimen admittunt respectu temporis sive durationis, ubi calli consideratio haud negligenda; etenim dantur recentes limbum minus durum habentes & callo tenuiore stipatæ: dantur quoque antiquæ & inveteratæ, quarum perpetui comites collositates solidiores & compactiores cernuntur. Tandem differentiam desumere licet a simplicitate & multiplicitate ac figurarum fistularum, dum aliæ simplices sunt, aliæ in plures cavernas divisæ, quæ tamen in unum tractum terminantur: aliæ demum recta, aliæ flexa & tortuosa



tuosa via incedunt atque urethram partesque vicinas occupant. Quas quidem diversitates omnes respicere plurimum refert, quando quaestio incidit de fistuloso urethrae ulcere.

§. XI.

Observatis igitur atque ponderatis, quæ partim in definitione, partim in differentiis harum fistularum in medium fuere adducta, facilius erit discretam earum diagnosin paulo diligentius exponere. Dignoscitur autem ulcus fistulosum intra urethrae texturam abiens & in ejus cavum plane penetrans, salvis ac illæsis permanentibus partibus externis, ex materiae saniosæ acris per urethram emissionem. Conjunctus est præterea tumor in regione perinæi magnitudine ovum columbinum interdum superans, interdum quoque minus spatium occupans, qui materia ejusmodi heterogenea repletus, in aliis sensum minus dolorificum inferendo, in aliis pruritus, ardorem atque dolorem pariendo maxime sub mictu, ob collum vesicæ in consensum plerumque trahi solitum, patientem determinat ad sui compressionem, qua facta insignem ichoris ex urethra dein proficientis quantitatem eructat, donec intercedente aliquo temporis spatio rursus turgidus denuo evacuationem urgeat. Quod si sectione aperiat, ejusmodi tumor, prout jam inveteravit aut adhuc recentior fuit, parietes callo quoque plus minus obductos exhibet, insuperque foramine uno notabili aut pluribus in urethram hiantibus nonnullisque cuniculis lateraliter exspatiantibus se conspici-



ciendum præbet, quemadmodum talem fistulam non solum aliquot vicibus in nosocomiis, sed etiam hic loci observare mihi licuit. Si vero intra urethræ substantiam, illam non perforando, fistula proserpat, apertura simul in perinæo apparente, tunc illa detegitur immissione specilli & dilatatione orificii, quando illud per callum nimis arctum redditum accuratiori impedimentum objecerit explorationi. Quæ porro fistula introrsum in urethra & extrorsum in perinæo aut scroto apertura gaudet, in illa saniei pariter atque urinæ effluxus, per summam cutem exiens, observabitur & quo pluribus has partes pertusas deprehendes foraminibus, eo plures quoque prorumpentis urinæ numerabis scaturigines. An demum fistulæ varii associati sint anfractus & mæandri, id judicari potest ex quantitate ichoris effluentis: quo plus enim materiæ ichorosæ excernitur, quam quidem simplici spatio convenit unicusque sinus ad sensum sæpe exiguus capere non videtur, plures intus cuniculos reconditos esse, haud citra rationem colligendum. Idem patebit exploratione per candelam ceream aut specillum flexile instituta, vel pro re nata unius vel alterius sinus dissectione, quo eo facilior datur copia reliquorum progressum penitus inspiciendi. Diverso cursu exspatiantur mæandri hi in ambitu penis atque scroti, de quo testantur Miscell. Nat. Curios. Dec. 3. Ann. I. quæ quintuplicis in pene atque scroto fistulæ per fonticulos quasi quinque urinosum laticem transmittentis mentionem faciunt. Præterea quoque reliquas urethræ adjacentes partes pervadunt,



dunt, dum non tantum ad vesicæ collum ipsamque vesicam, sed & interdum ad inguina usque evagantur, qualis casus meminit Petrus de Marchettis in observat. Medico Chirurg. Sylloge Obs. LIX. Parili ratione nonnunquam ad intestinum rectum deflectunt illudque perforant, unde urina per anum profluit & subinde pro conditione & diversitate situs finuum feces alvinæ & materia saniosa cum urina excernuntur, quemadmodum exemplum §. VIII. propositum id confirmat.

§. XII.

Causas fistularum urethræ æqua animi lance nunc ponderandas dum aggredior, eas commode in internas & externas dividi posse arbitror. Inter internas non exigui momenti censendum est ulcus urethræ profundiore infectione a gonorrhœa productum, quæ cum prostaticarum exulceratione plerumque foveatur, adstipulante Bartholino Cent. 2. Histor. Anatom. 36. ita successu temporis inveterata & radicata reddita ulcus constituit, quod sanie, quam semper fundit, virulenta acri, partes subjectas altius exedendo sinus & callositates sibi efficit, quæ postea de fistulæ præsentia sufficiens perhibent testimonium, cujus commatis casus aliquot Excell. Dn. Præses, Patronus ac Præceptor meus ætatem venerandus pro sua in me benevolentia communicavit. Huc quoque referri debet urinæ incarcerationio atque retentio ob urethræ, per quam alias urina emitti solet, obstructionem, a qualicunque illa demum provenerit causa, inter quas tamen communissimam esse, nul-

lum



lum est dubium, carunculam, seu, uti peritiores inter modernos e. g. Brunnerus in Ephemerid. Germanic. Cent. I. & II. statuunt, illius angustiam & coarctationem ab ulceribus hujus meatus, dum ad consolidationem perducuntur, obortam, quæ impedimento est, quo minus pleno, ut ajunt, alveo effluat urina, sed potius instar fili exigui magnis cum nifibus & doloribus excernatur, quid? quod sæpius omnimode supprimatur, unde serofus hic humor majorem longiori mora acridinem assumeus & in corruptionem abiens aliud sibi patefacit iter, accersendo inflammationem & abscessum, haud raro cum gangræna perinæi atque scroti & substantiæ urethræ amissione conjunctum, ut dein, qua datur porta prorumpat frequentiusque fistulam vix sanabilem post se relinquat, qua de re evolvatur Hildanus Cent. 5. obs. 77. nec non Theod. Kerckringius obs. 54. pag. 115. de egeno quodam, cujus in cadavere infra scrotum fistula fuerit reperta, referens, quod per hanc ob urethram transitum negantem viam sibi parasset urina. Ejusdem pariter, si non peioris notæ symptomata ab acribus & corrosivis usurpatis ad tollendas carnosas in urethra excrescentias notatas vide apud Henr. a Moinichen obs. 17.

### §. XIII.

Causis internis etiam annumerari debet prava humorum constitutio & dyscrasia scorbutica, potissimum autem virus venereum cum corpore communicatum & intra ipsius compagem delitescens hic accusari meretur. Sæpius enim causam violentam



externam prægressam si excipias, ab humoribus heterogeneis impuris aliquando confluentibus & in istam delapsis, vel a fluxu seminis calidioribus diureticis & fortioribus stimulantibus tractato, aut ab adstringentibus suppresso urethræ partiumque conterminarum inflammationem produci deprehendimus, quæ febre perpetua insigniorum inflammationum comite stipata postmodum, nisi discutatur, in abscessum degenerat, quem hic curare cum sit gravissimum teste Severino de recond. abscess. natura, facillimo identidem negotio in ulcus & fistulam facessentem. Quod vero exinde tam facile progignatur ulcus ejusmodi fistulosum, mirandum non est, si perpendatur, in recensitis his morbofis affectibus humores ipsos, per vasorum systema circulari motu progredientes, particulis excrementiis ad corruptionem pronissimis refertos esse, vel ipsa organa, in quibus ulcus nidulatur, jam antea nimis debilitata & a tono suo dejecta esse, hinc non aliter fieri potest, quin fluida corporis nostri, extra circulum posita motuque intestino agitata, acriorem corruptionis qualitatem induant, quæ partium, quas afficiunt, fibras magis corrodendo & depascendo capaciores sibi efformant cavitates. Accedit quod apostema, ab inflammatione his in partibus facta, enatum multum faveat generationi præsentis ulceris, quando ipsius apertio nimis prorogatur aut etiam, si dissectum fuerit, debita ejus mundificatio & absterfio posthabetur, unde materia purulenta vel prorsus effluere nescia, vel satis commodum ad minimum exitum haud inveniens majorem



jorem ulteriore retentione erodendi facultatem contrahendo in nocivum transit ichorem, gravitate sua per poros descendente, neque minus acrimonia, qua pollet, fibras, membranas & vasa exedendo & dilacerando cuniculos & latibula sibi parantem, quæ diuturnitate temporis per partes quoque adjacentes progressum suum extendere animadvertuntur. Addendum porro, ulcera ejus generis a præterfluente & allabente acri urina pertinacius foveri, dum hac ipsa succus nutritius laudabilis corpusculaque gelatinosa, substantiæ deperditæ restorationem promoventia, absterguntur partesque magis arroduntur, ut adeo consolidatio & novæ carnis accretio mirum quantum impediatur. Cur vero sinuum orificia & parietes callo obducantur, ratio dubio procul hæc afferri potest, quod videlicet partes fibrosæ ac tubulosæ, a detento pravo humore discissæ & dissolutæ, ad principia sua recedant & in undulatam quasi superficiem corrugentur & quidem hoc eo facilius, cum in statu integro tensioni suæ semper resistentes se abbreviare malint. Sub hac itaque contractione evenit, ut liquida intra fibrarum interstitia se moventia expellantur, quo facto non possunt non propius ad se invicem accedere harum latera, imo penitus coalescere sicque duritiem, calli nomine insignitam, in tota sinus elongatione producere. Adjiciendum & hoc loco aliquid est de aëris in callo generando efficacia. Habet enim hic id singulare, quod, nisi ab ulceribus, inprimis sub eorum deligatione diligentius arceatur, ob liberiores sui



admissionem fibras jam contractas magis constringat, firmioremque fluidorum transitui obicem ponendo majus callo incrementum addat. Apparet etiam hinc ratio cur callo præsentē nulla partium coalitio expectanda sit, utpote quæ debito succi nutritii appulsu per vasa ad omnes corporis partes ne minimis quidem exclusis absolvi ac perfici debet, quod vero hic denegatur, cum vasa occlusa adventi hujus succi cum sanguine ingressui non amplius cedant nec ulterius se extendi patiantur.

§. XIV.

Restant adhuc commemorandæ causæ externæ, quarum sat magnus se offert numerus, inter quas tamen frequentissimam esse judico vulnus urethræ sub calculi ex vesica extractione factum. Compertum enim est, sub negotio lithotomiæ per majorem spetiatim apparatus administrandæ in perinæo seu spatio inter scrotum & anum intercedente, urethram non procul a vesicæ collo, præcipue, si sectio quadantenus extendatur, incidi, quo mediante hac apertura accommodatis in vesicam per ejus collum immisiss instrumentis calculus eximi possit. Negandum quidem hic non est, pariter urethram aperiri sub minimo apparatu, a prudentioribus chirurgis nostris temporibus tunc saltem adornari solito, quando ipsi vesicæ collo aut principio urethræ calculus progredi nescius inhærescit, cum tamen hic casus rarius obtingat, ita prioris methodi mentionem ex professo tantum injicere placuit. Evenit autem sub urethræ læsione, ut illa in symptoma calculi sectis molestis.



lestissimum, fistulam nempe, facile degeneret, quod rursus variis de causis accidere potest. Et quidem primum nominari meretur culpa chirurgi, quatenus turundis aut cannulis justo diutius utitur, quorum abusu efficitur, ut labia vulneris nimium iisdem compressa callosa & sinuosa evadant. Taceo quod Chirurgus etiam accusandus sit, quanpo sufficientem repurgandi, aut abstergendi vulneris curam non habuit, sed potius præmaturam ipsius consolidationem acceleravit; nec minus, si præterlapsis quatuor aut quinque diebus exactiorem labiorem dehiscentium appropinquationem conveniente constrictione aut compressis lateraliter admotis aut emplastrorum glutinantium applicatione non promoverit. Respectu patientis itidem fistula induci potest, si vel urinae salibus acribus abundans perpetua sua transgressione consolidationem turbet vel insignis urethræ partiumque conterminarum dilaceratio a calculo asperiore aut nimium volumen complectente, suppuratione graviore excitata, citiorem coactum sufflaminet, vel denique ipse patiens vitioso regimine circa diætam, animi pathemata & motum corporis, vel ob insufficientem crurum compressionem vulnus in deteriore statum deducat. Præterea fistulam urethræ prognerare possunt adhuc aliæ causæ externæ, qualis census sunt contusiones ex equitatione, remigatione, ictu, casu ab alto &c. quæ cum ratione superius allata occasionem fistulis pariendis subministrant, ita iisdem prolixius enucleandis supersedere consultum duxi.



§. XV.

Confero me jam ad Prognosin tradendam, quæ cum scopum haud semper nanciscatur exoptatum, magna cum circumspeditione suggerenda est; tantum enim negotii interdum facessit hæc fistula, ut scandalum chirurgorum fere audire possit. Legatur in hunc finem Hildanus Cent. 5. obs. 75. ita differens: „Videant juniores chirurgi, ut in prognostico „fistularum perinæi (per quas hic loci eas, quæ urethram præcipue infestant, intelligit) sint prudentes. „Si enim ex causa interna facta fuerit fistula, nunquam perfecte sanatur. Obducitur quidem nonnunquam cicatrice, sed facillime a causa aliqua interna recrudescit & nonnunquam, si ad tempus clausa persistit, gravissima symptomata subsequuntur. In universum quidem difficillime sanantur omnes hæc fistulæ, quædam tamen ex istis curatu faciliores, difficilioresve aut plane incurabiles æstimandæ sunt, ad quas circumstantias omnes in prognosi æque accurate diligenter animo attendendum est. Fistula itaque urethræ, quæ substantiam ejus saltim invadit, nec in ejus cavum penetrat, callo insuper molliori obfessa & apertura extrinsecus prædita est, curationem præ reliquis facilius admittit. Idem judicium ferendum est, si fistulam hanc adhuc recentiores nonnulli sinus & cuniculi comitentur per partes vicinas externas, imprimis per panniculum adiposum, ob vesicularem, qua gaudet, substantiam saniei facile cedentem, breviori cursu serpentes, unde ob minus gravem partium corruptionem facilius quoque speranda sanatio. Difficilioris



lioris vero curationis illæ sunt, quæ urethram æque ac integumenta externa pertundunt insignioremque substantiæ urethræ deperditionem junctam habent, quæ diutius inveterarunt profundiusque introrsum tendunt; nec minus, si multis anfractibus callo annoso valdeque duro obductis partes perrepent propinquiores. Sic haud levibus quoque difficultatibus stipatur cura, si fistula orificio interius saltem respiciente dotata sit, cum sub hac conditione medela ipsi afferri nequeat, sed potius chirurgus tuberculum exterius conspicuum incidere necesse habeat, quo illa postmodum in toto suo ambitu patefcat convenientique methodo tractari possit. Alias quidem parum molestiæ parit hæc fistulæ species & citra gravem noxam per aliquot annorum intervallum tolerari potest a patiente, modo tuberculum sanie repletum diligentius exprimatur, quo materia saniosa per urethram excernatur hincque eo minus, cum longiori mora majorem contrahat acredinem, partes conterminas depascere atque exedere capax fit.

§. XVI.

Quæ porro fistula simplici aut pluribus tractibus vesicam atque anum perforat altiusque has partes occupat, aut forsan ad ossa Ischii vel Pubis, vitium simul ipsis affricando, excurret, quamvis tale exemplum in præsentī mihi non constet nec apud auctores offendere mihi contigerit, possibilitas tamen existentiae ejusdem ex hoc capite prorsus non rejicienda sit, ea plerumque opem medentis omnem eludit ob ju-



Itam necessariamque remediorum atque instrumentorum applicationem hic denegatam, hinc nihil solennius est, quam ut sub tali statu vires consumantur, gravioraque mala, totam œconomiam animale pervertentia, ut tabes, hectica, totales urinæ suppressiones, gangræna, quin sphacelus, symptomatum sæpius agmen claudens, opinione celerius inducantur. Mala quoque nascitur prognosis, quando senes, cachectici, scorbutici, lue venerea affecti tali fistula laborant, siquidem, nisi prius hi morbi, pabulum impurum semper subministrantes, auferantur, quod etiam tam brevi temporis spatio perfici nequit, sanationem ægerrime recipit. Tandem silentio haud prætereundum est, fistulam urethræ inveteratam, emunctorii naturalis quasi vice fungentem, sæpe corpus ab aliis morbis præservare hancque ob rationem non semper secure ad consolidationem perduciposse. Huic sententiæ calculum adjicit Hildanus obs. chirurg. 73. Cent. 5. exemplum viri in medium proferens, cui, cum fistulam ejusmodi multis laboribus cicatrice obduxisset, post curationem tot tantaque supervenissent symptomata, ut illam rursus aperire coactus fuerit, quo facto æger non solum convaluisset, sed & multos annos commode vixisset, neque consolidationem fistulæ amplius tentare voluisset. Negandum quidem hic non est, hoc assertum non pro universali esse assumendum, ita ut ob metuenda pejora symptomata antiquæ fistulæ curatio nunquam suscipi debeat; si enim peregrinam humorum dyscrasiam congrua correctione & repurgatione, ut & matura & sufficiente impu-



impuritatum evacuatione immutare annitamur, metus hic facile evanescet: Id tamen probe tenendum est, hanc regulam utique applicationem invenire in majoribus nosocomiis & apud vilioris sortis atque conditionis homines. Quem enim fugit in xenodochiis, ubi ægrotantium copia affluit, non tam exacte curam læsionum externarum internam respici posse, sed potius saltem invigilari earum medelæ per remedia externa, hinc si labe exterius consolidata dimittantur, postea pejus se habent atque de aliis pathematibus, organa nobiliora pectus inprimis & caput invadentibus, conqueri incipiunt. Taceo quod si vel maxime depurandæ sanguinis massæ ratio habita fuerit, talismodi tamen subjecta, cum ipsis res sit nimis angusta domi, ob minus accurate servatum vitæ regimen pravam humorum qualitatem sibi rursus contrahant, ut itaque aut prius malum recrudescat, aut alii morbidi affectus corpus non sine periculo aggrediantur, id quod multiplici confirmari potest experientia.

§. XVII.

Perlustrata nunc & cognita morbi natura restat ut legibus semel cœpti ordinis insistam & qua ratione cura institui debeat, suppeditem; antequam vero ad ipsam curæ pertractationem me accingam, circumstantiæ quædam methodum medendi propius attingentes exponantur ac præmittantur necesse est. Chirurgus itaque ante omnia fistulæ qualitatem & ductum aliquot ante operationem suscipiendam diebus solertius perpendat exploretque, si fistula exti-



mam cutem perforaverit, beneficio instrumenti scrutationi inservientis, sive fuerit stylus sive candela cerea, facta simul orificii, si non satis hiet, per turundas indendas dilatatione, num pluribus sinibus quorumque ii tendant, latius evagetur, quo postea firmum formare possit iudicium, incassumne sit laboraturus, an vero exoptatum nactura sit successum operationis. Præterea quoque Chirurgus impedimenta laudabilem sanationem turbantia removere studeat: quam ob rem mentem præcipue eo dirigat & consideret, utrum causa interna fomitem huic malo præbeat, an viscera patientis bene sint constituta, quod ex firma aut iniqua corporis valetudine colligitur, an senectuti succumbat, aut viribus exutus sit. Quod si enim patiens fuerit mali habitus, cacochymicus, vel lue venerea laboret, aut scorbuto tentetur, hi morbi antea ut superentur & arceantur, sana dicitur ratio, si infructuosum curæ effectum experiri nolumus. Porro studiose observetur, num symptoma aliquod alicujus momenti supervenerit, utpote insignis partis affectæ dolor, suborta inflammatio, præsentia febris & id genus alia, ex quacunque propullulent causa, operationis prorogationem exigunt atque tam diu ab illa abstinendum esse suadent, donec pluribus præfidiis juxta artem & subjectorum differentiam usurpatis cesserint, cum alias justus impendeat metus, ne in deterius labantur omnia atque symptomata periculi plenissima accersantur.

§. XVIII.

Inter recensitas has cautelas quoque referre convenit



venit præparationem ægrotantis, a sanioribus chirurgis in quavis operatione paulo difficilioris successus & eventus in usum trahi solitam. Cum enim in aprico positum sit, sanguini, dum motu suo in orbem redeunte partem hanc, a fistula exesam & corruptam, alluit, humorem ichorosum admisceri, inquinacioni ipsius inducendæ haud parum patrocinantem & quidem hoc eo gravius, quo amplius fuerit ulcus; ita improbandum foret, si in præsentē hoc casu, apparente quamvis adhuc sat vegeta corporis constitutione, sanguinis correctio pravarumque particularum absterfio & ejectio negligeretur. Ad hos effectus vero præstandos nil convenientius judico ordinacione decocti, singulis diebus aliquot vicibus calide bibendi & per reliquam affectus curam pro circumstantiarum ratione continuandi, ex sassapar. chin. bardan. lign. sassafras, herb. sanic. veronic. agrimon. & similibus parati, cui etiam lignum guajacum adjiciatur, utpote cujus usum egregium in sinuosis & fistulosis ulceribus omnibus miris prædicant laudibus Tagaultius l. 2. instit. chir. cap. 18. Forest. lib. 7. obs. chir. 16. aliique magni nominis auctores. Simul quoque eodem tempore laxantia binis aut tribus vicibus repetenda exhibeantur, ad cruditates in intestinorum canale stabulantes extra corporis compagem eliminandas. Et quoniam ulcerosæ ejusmodi corruptiones ab humorum abundantia magis foveantur, ita præsentē plethora sanguinem superfluum venæ sectione imminuere conducit. Nec minus diæta bona observetur, assumendo alimenta optimi succi &



facilis digestionis & fugiendo cane pejus & angue omnia nimis frigida, concoctu difficilia, acida, falsa æque ac animi pathemata graviora. Cæterum non abs re erit, si brevi ante operationem clyster injiciatur, quo alvus excrementorum sarcinam deponat, cum alias facile ob dolores, quos sub sectione fistulæ subire necesse habet patiens, feces alvinæ excidant adeoque haud levem chirurgus afferant molestiam. Denique etiam tempore idoneo, quale horæ antemeridianæ, cælum serenum & aër temperatus indicant, operationem instituere proficuum est. Et hæ sunt notatu digniores circumstantiæ, quæ chirurgus ante operationem administrandam cognitæ perspectæque esse debent.

§. XIX.

Quibus omnibus ita ordine præmissis dispiciendum jam est, quid auxilii adversus hanc fistulam et chirurgia depromendum & qua ratione operatio ejus conficienda sit. Sciendum autem est, duplici illam adornari posse modo & quidem vel septicorum applicatione vel sectione, ubi tamen animadvertatur, utrasque has methodos in quavis fistulæ specie non semper pari gaudere utilitate, sed unam præ altera majori pollere prærogativa accommodatioremque esse, quod e sequenti fistularum cura tradenda distinctius palam fiet. Labet autem initium capere a methodo sanandi fistulam urethræ externam, quæ sequentem in modum instituitur. Ægro, quemadmodum sub lithotomia moris est, convenienter collocato, aut saltem lecto imposito, capite & dorso depressis



pressis & natibus aliqua ex parte elevatis diductisque  
suffICIENTER cruribus, ad perinæum eo melius conspi-  
ciendum, fistula quoad exteriora ordinario nimis an-  
gusta turunda ex spongia compressa, cera probe im-  
buta, extendatur aut, quod præferendum, apta inci-  
sione aperiatur, quo callositates magis denudentur  
& medicamenta eas consummentia rite applicari que-  
ant. Orificio itaque fistulæ satis amplo reddito septi-  
ca linteo discerpto excipienda & callo admovenda  
sunt, quæ pro diversitate calli adhuc recentis aut  
jam inveterati leniora aut fortiora requiruntur. O-  
mnium commodissime autem, cum solum digesti-  
vum, callo paulo duriore existente, voto non satisfac-  
iat, hic adhibentur decoctum fol. tabac. cum un-  
guento ægyptiaco & melle rosato invicem mixta &  
in unguentum redacta aut in liquidiori forma reli-  
cta, utpote quæ in superficiali impuritate mucosa ab-  
stergenda, fibrillis corruptis auferendis callositati-  
busque removendis efficaciter se gerunt. Vel loco  
hujus substituatur illud Sculteti, quod ex Merc. præ-  
cip. rubr. & mell. rosac. componitur & mediante  
plumaceolo callosæ duritie imponendum est. In-  
terea etiam in id incumbendum est, ut humorum  
affluxus præcludatur & ambitum occupans stasis di-  
scutiatur, cui fini obtinendo inserviunt res solventia,  
nervina, camphorata, si sacculis inclusa calide appli-  
centur aut in emplastri forma usurpentur. Duritie  
tandem omni sublata detersoque vulnere cavitas no-  
va carne replenda remediisque balsamicis e myrrha,  
succino, mastiche g. elem. bals. peruv. copaivæ con-  
fectis



fectis fibrarum erosarum coalitio vulnerisque consolidatio adjuvetur. Quodsi plures autem adhuc sinus se visui offerant, ii pariter sectione dilatandi & uti monitum, ulterius tractandi sunt.

§. XX.

Accessum nunc facio ad fistulam urethræ completam, quæ nempe interna & externa apertura prædita est, indagaturus, quomodo ope incisionis tanquam methodo reliquis longe anteponenda & uti illam ab exercitioribus chirurgis, cum in Gallia, tum in Belgio, administratam vidi, auferri queat. Peragitur autem illa sequenti ratione: Ægro in decentem situm, in priori paragrapho descriptum, deducto & ab aliquot robustis viris detento, partim ut luci, chirurgus inter secandum necessariæ, haud quicquam obstare possit, partim ut æger dolorum vehementia vexatus operationem turbare nequeat, fistulæ orificium nimis arctum sectione dilatetur, dein callositates, latera foraminis urinam stillantis ambientes, cauta manu, absterso per vices sanguine, excindantur, & removeantur, donec caro viva labiaque cruore recente turgida in conspectum veniant & faciliorem tutioremque curationem promittant, quibus ita gestis postea commodæ vulneris deligationis symptomatumque supervenientium allevationis exactior cura habeatur. Vulneri igitur lintea saltim sicca & discerpta aut ob graviolem forsan hæmorrhagiam complicatam plumaceoli adstringentibus pulverulentis conspersi vel liquidis imbuti, quo etiam pertinet spiritus vini rectificatissimus, inprimis



mis cum terebinth. g. elem. & mastich. digestus, adplicentur, quibus deinceps compressulæ duplicatæ cum emplastro defensivo superimponantur, cavendo tamen, ne sanguinis effluxus, qui, si moderatus fuerit, potius tolerandus est, simultaneo impetu cohibeatur majorque inflammatio, tumor, copiosiorque puris generatio cito pede subsequantur. Qua de causa ad mala hæc intercipienda conducit perinæi regionem more Gallorum spleniis oxycrato vel vino rubro ebriis diligentius fovere totumque tandem deligationis apparatus fasciâ notissima, duplex quasi T referente & post lithotomiam adhiberi solita, firmare, utpote quæ in spleniis firmitus sustentandis non solum punctum absolvit omne, sed & anum pro fecibus liberius excernendis minus obtectum relinquit. Primo interim apparatu altero die sublato vulnus linteis mundis & mollibus vel spongia vino calido imbuta blande purgetur, lapisque moveatur omnis, ut labia ipsius decenter uniantur & tubuli vasaque discissa, succo vitali adhuc abundantia, quantum possibile sibi adaptentur. Quem in finem balsamum Arcæi, Gallis in ejusmodi casibus usitatissimum, leni calore solutum vulneri immittendum exteriusque plumaceolis eodem balsamo oblitis illud operiendum probeque observandum, quo aëris, vulnera promte alterantis & succos in motu suo valde impredientis, nimius concursus aliæque injuriæ externæ sub deligatione omni studio arceantur. Ulterius autem adhuc monendum est, ut emplastris aliquot glutinantibus applicitis mutu-



um labiorum contactum procuremus, in quo facilitando compressæ tenues lateraliter appositæ effectum quoque haud contemnendum exerent. Nec minus rationi consentaneum erit, si, tumore, inflammatione aut aliis gravioribus symptomatibus non obstantibus, vulnus uno vel altero futuræ puncto constringatur, quippe quo id efficitur, ut labia eo propius ad se invicem accedant hincque consolidatio magis accelerari possit. Deligatio porro non citius vel frequentius quam sana ratio suadet, instituatur adeoque singulis alternis saltem diebus renovetur, eo quod sæpius repetitæ religationes, nisi aliud quid urgeat, sanationem magis retardent, tantum abest, ut illam promoveant. Sub reliquo denique curæ tempore femora semper conjuncta teneantur, quæ in hunc scopum potius colliganda sunt hæcque simul adhibeatur cautela, ne sub perficiendis deligationibus nimis diducantur. Insuper ab omnibus incongruis motionibus abstineat æger, parum potulenti assumat atque tam diu in lecto se detineat, donec vulnus propemodum occlusum ambulationem moderatam non amplius prohibeat.

#### §. XXI.

Atque hac proposita methodo observata & ab experto chirurgo administrata asseverare audeo, quod fistula hæc tam rebellis & refractaria, nisi huic cedat, multo minus aliis curandi modis sit obtemperatura. Dolendum tamen, illam ipsam, circumstantiarum regularumque quantumvis omnium



um cura habita fuerit exactissima, ad perfectam non-  
nunquam consolidationem nulla arte perduci posse,  
inprimis ubi virus venereum primam suppeditavit  
causam & quidem partim ob substantiam urethræ  
nimiam deperditam, partim & quidem multoties  
ob urinam, vulnus sub transitu perpetuo alluentem  
& deterius reddentem, ut adeo etiam ad hujus de-  
rivationem per alium locum aut saltim, quo minus  
transfluxu suo ipsi vulneri noceat, varios a variis  
subinde excogitari modos noverim. Verum si le-  
vi meo judicio dicendum quod res est, omnibus iis-  
dem modis ita comparatum esse mihi videtur, ut  
vel fistula in alio vesicæ loco ob cannulam pro e-  
missione urinæ diutius detinendam excitari possit,  
vel urina omnis, crassiori & acriori, vesicam postea  
arrodente, retenta, non excernatur, vel alia incom-  
moda haud flocci pendenda & pro diversitate me-  
thodi adhibendæ etiam diversa inducantur. Cum au-  
tem summæ inter sanandum difficultates a perito ar-  
tifice sæpius præter spem debellantur, ita obstacula in  
præsenti casu se offerentia acutiori judicii lima ma-  
jorque experientiæ firmitudine præditis pariter su-  
peranda relinquere consultum duco. Hisce discus-  
sis quædam adjungenda esse arbitror de sinibus scro-  
tûm perreptantibus & ob connexionem, quam fo-  
vent cum principe fistula, urinam transmittentibus.  
Tales itaque si præsto sint, prævia facta exploratio-  
ne, quo itinere nimirum progrediantur, sectione at  
provida & circumspecta patefaciendi & deinde sca-  
rificandi sunt, quo facto sequenti deligatione callo-  
sitati-



fitatibus unguentum digestivum, cui, si illæ crassiores fuerint, aliquid ung. ægyptiac. vel merc. præcip. rubr. admisceatur, adplicandum atque tam diu continuandum, donec durities omnis remota fuerit, posthæc autem vulnus balsamicis tractandum & consolidandum est.

§. XXII.

Nunc e re fore existimo, ut quædam etiam de fistula urethræ interna notentur. Cum autem hæc, uti sub prognosi dictum fuit, non adeo periculosis symptomatibus stipata sit, modo invigiletur tuberculi in perinæo conspicui frequenti repurgationi per injectiones abstergentes & ejusdem expressioni ad saniem per meatum urinarium emittendam, quo diuturniori mora partes substratas eo minus corrodere possit: ita si cura ipsius efflagitetur a patiente aut ad majores partium erosiones evitandas ea magis proficua judicetur, convenit tuberculum, cum visu tum tactu præcipue si sanie turgeat discernendum, incisione aperire & explorare, qua ratione fistulæ qualitate comparatum sit, qua demum perspecta eidem methodo, quæ in fistulam completam sanandam adhibetur, insistatur. Quod tandem ad fistulas reliquum urethræ tractum occupantes attinet, sciendum, quod si occurrant, nullo alio præsidio melius sanari queant, quam labiis foraminis, per quod urina sub mictu æque ac semen sub coitu effluit, convenienter incisus, quo facto sanguinis laudabilis affluxu nova carnis rubellæ generatio faciliter possit: quo fine etiam ad urinam arcendam injuncto simul potu exiguo can-  
nula



nula plumbea vel argentea in urethram usque ultra sectionis locum immittatur, tamdiu in ea relinquenda, donec vulnus bono balsamo vulnerario admoto carne sensim oppleri & consolidari incipiat.

§. XXIII.

Antequam tractationi huic coronidem imponam, pauca adhuc de diætâ subjungenda restant. Talis autem servanda est, quæ morbo nullo modo patrocinetur, sed potius ipsius vim refringit, curamque properat. Evitentur itaque omni studio quævis acida, salsa, crassa & frigida semperque rationis freno dirigatur affectuum vehementia, utpote quibus omnibus indubitato malum exasperatur pejoremque nanciscitur conditionem. Potius animus ad tranquillitatem sit dispositus & exacta victus ratio observetur, parum inprimis potulenti ingerendo, nec non jura carniû, carnes teneriores, ova forbilia & alios ejusdem generis cibos expeptos capiendo, ubivis autem temperiei studeatur. Reliqua e prioribus satis patent, adeoque filum hic abrumpo supremoque Numini pro largita hætenus studiis meis benedictione gratias persolvo devotissimas.

**S**Als Fleiß und Frömmigkeit nebst Tugend und Verstand  
 Bey Ihn mein Freund vermocht ist vielen schon be-  
 fandt,

Drum wünsch aus treuer Brust, / Daß Ihn nur nach meriten  
 Fortuna krönen mag durch angenehmen Suiten.

Hiermit hat dem Herren Respondenti als seinen wer-  
 thesten Freunde, zu seiner schon längst verdienten  
 Doctor-Würde herzlichlich glückwünschen wol-  
 len, dessen aufrichtiger Freund und Diener

**Johann Friedrich Oldehoff.**



**G**ehretster, Dein erfahrner Fleiß,  
 Der Kern für Spreu zu wehlen weiß,  
 Und Gold an statt der Schlacken liebet,  
 Ist würdig, daß ihm Kunst und Zeit,  
 Zum Merckmahl der Erkenntlichkeit  
 Den Lohn verdienter Ehre giebet:  
 Drum nimmin Hygeens Lorbeer-Kranz;  
 Und wisse, daß sein reiner Glanz  
 Dich mehr als Perl und Demant schmücke.  
 Trift Hoffnung, Wunsch und Sehnsucht, ein:  
 So muß Dein Ruhm stets steigend seyn;  
 So spühest Du Wohlfahrt, Heyl und Glück.

Zum zeichen seiner aufrichtigen Ergebenheit  
 schreib dieses des Herren Candidaten  
 verbundener Diener und Landsmann

**Johann Victor Kranse.**

**C**orporis humani præstans Anatomica nostro  
 Tempore cognitio jamjam florere videtur,  
 Dum nova multa sagax multorum cura virorum  
 Protulit in lucem, densis quæ tecta sub umbris,  
 Inque dies semper nova detegit abdita quærit.  
 Sic fere certatim celebri versatur in arte  
 Quisque, salutavit primo qui limine Musas  
 Artis Apollineæ, seduloque cadavera cultro  
 Subjicit: ast multis animis gravis insidet error,  
 Ac si rimari subtilius arte minores  
 Corporis humani partes labor irritus esset,  
 Cum Medicina tamen fructus exinde recepit  
 Innumeros, ut non illud neget arte peritus.  
 Sed quid, amabo, juvat plebeja scientia talis,  
 Quæ nucleum spernens in cortice turpiter hæret?  
 Talis enim non est excellens arte magister,  
 Cujus prompta manus validas discerpere partes  
 Usu quam longo didicit, qualisque figura  
 Exterior, nexus, rudis & structura situsque

Parti-



Partibus his infint, oculo lustrasse fugaci  
Contentus memori servat modo nomina mente:  
Is vero est illa genuinus in arte peritus,  
Qui solide, quantum potis est, perquirere curat  
Subtiles partes, tamen ex quibus organa magna  
Constant, ut verus pateat mox usus eorum  
Et ratio fabricæ, morbosque fugare rebelles.  
Sic nunc exemplo monstras, Doctissime BECKER,  
Quantum contribuat perfecta scientia partis  
Ad grave sæpe malum feliciter arte domandum,  
Dum Tu, qui solide versatus in arte secandi,  
Exstirpanda doces, quæ fistula fœda pudendo  
Ulcerâ contraxit, primum quo fabrica constet  
Causaque vera mali curas, tandemque medendi  
Eruis inde modum doctæque fatisque perite.  
Hinc quos jam dudum meruisti dignus, honores  
Præmia ceu poscis studiorum digna Tuorum:  
Gratulor ex animo, DEUS ut Tua cœpta secundet  
Quævis & ex voto Tibi cedant omnia pleno;  
Ingrediare Tuam felici fidere praxin,  
Et supera chronicos morbos & pelle malignos,  
Nec sine, quo lateat Tua pulchra scientia tecta,  
En! hæc est animi sinceri tessera vera.

Ita Nobilissimo nec non Doctissimo Dn. Candi-  
dato, Fautori & Amico in oculis ferendo, mul-  
ta cum laude ad Doctoris gradum in arte  
Medica adspiranti applaudit

Daniel Gottlob Thebesius,

Halens. Magdeb. Med. C.

---

**S**cripsit Virgilius: Labor improbus omnia vincit;  
Hoc sibi mandatum plures habuere periti,  
Expertique suo magno sunt postea fructu,  
Quod canit hic vates, id vero verius esse;  
Namque tulere sui jam præmia magna laboris.  
Nunc &, Amice, Tuus labor improbus omnia vincit,

Nunc



Nunc quoque consequeris tolerata præmia noctis,  
Doctorisque decus Tua tempora docta coronat,  
Sudoris gemmas gemmæ comitantur honoris.  
Gratulor ex animo Tibi paucis versibus, & sit  
Hæc ut læta dies similes illamque sequantur,  
Innumeros morbos ut vincat provida cura.

Hicse Clarissimo Dn. Candidato gratulari voluit

J. C. J. Eller.

---

**S**Ein Bruder, nimm die Frucht vollkommner Liebe hin;  
Nimm den getreuen Wunsch, den ich Dir schuldig bin;  
Verstatte, daß mein Herz die rege Freude zeigt:  
Da Dein bemühter Fleiß auf den Catheder steigt.  
Und schließ ich gleich die Lust in enge Gränzen ein:  
So soll doch jedes Wort der Sehnsucht Zeuaniß seyn.  
Der Himmel wolle Dir Vergnügen, Ruh und Leben,  
Glück, Ehre, Wohlergehn, in reichen Masse geben.

Dieses wünschet aus ungeheuchelter  
Brüderlichen Liebe

Johann Andreas Becker.

---

**D**Ebita virtuti dum fers, CARISSIME FRATER,  
Præmia, dum merito fulget honore caput;  
Gratulor ex animo, sperans felicia quæque,  
Et dabit ex voto prospera cuncta DEUS.

Ita fratri optimo applaudere voluit

Joannes Adolphus Becker.

